

四庫全書

史部

欽定四庫全書

繹史卷二十四之六

靈璧縣知縣馬驥撰

周禮之制

六

曲禮

禮記曲禮曰毋不敬儼若思安定辭安民哉教不可長
欲不可從志不可滿樂不可極賢者狎而敬之畏而愛
之愛而知其惡憎而知其善積而能散安安而能遷臨
財毋苟得臨難毋苟免狠毋求勝分毋求多疑事毋質

直而勿有 若夫坐如尸立如齊禮從宜使從俗夫禮者所以定親疏決嫌疑別同異明是非也禮不妄說人不辭費禮不踰節不侵侮不好狎修身踐言謂之善行行修言道禮之質也 禮聞取於人不聞取人禮聞來學不聞往教 道德仁義非禮不成教訓正俗非禮不備分爭辨訟非禮不決君臣上下父子兄弟非禮不定宦學事師非禮不親班朝治軍涖官行法非禮威嚴不行禱祠祭祀供給鬼神非禮不誠不莊是以君子恭敬

搏節退讓以明禮 鸚鵡能言不離飛鳥猩猩能言不離禽獸今人而無禮雖能言不亦禽獸之心乎夫惟禽獸無禮故父子聚麀是故聖人作為禮以教人使人以有禮知自別於禽獸 太上貴德其次務施報禮尚往來往而不來非禮也來而不往亦非禮也 人有禮則安無禮則危故曰禮者不可不學也夫禮者自卑而尊人雖負販者必有尊也而况富貴乎富貴而知好禮則不驕不淫貧賤而知好禮則志不懾 博問強識而讓敦善行

而不怠謂之君子君子不盡人之歡不竭人之忠以全

交也

禮○曲

不疑在躬不度民械不願於大家不訾重器

事君者量而后入不入而后量凡乞假於人為人從事者亦然故上無怨而下遠罪也不窺密不旁狎不

道舊故不戲色

毋拔來毋報往毋瀆神毋循枉毋測

未至士依於德游於藝工依於法游於說毋訾衣

服成器毋身質言語

儀○少

君子有三患未之聞患弗

得聞也既聞之患弗得學也既學之患弗能行也君子

有五恥居其位無其言君子恥之有其言無其行君子恥之既得之而又失之君子恥之地有餘而民不足君子恥之衆寡均而倍焉君子恥之

○雜記

四郊多壘此

卿大夫之辱也地廣大荒而不治此亦士之辱也為

人臣之禮不顯諫三諫而不聽則逃之子之事親也三

諫而不聽則號泣而隨之君有疾飲藥臣先嘗之親有

疾飲藥子先嘗之醫不三世不服其藥

○曲禮

為人臣

下者有諫而無訕有亡而無疾頌而無譌諫而無驕怠

則張而相之廢則埽而更之謂之社稷之役○少儀內

亂不與焉外患弗辟焉

○雜記

君子曰謀人之軍師敗

則死之謀人之邦邑危則亡之國亡大縣邑公卿大

夫士皆厭冠哭於太廟三日君不舉或曰君舉而哭於

后土軍有憂則素服哭於庫門之外赴車不載橐鞬

○檀弓

大夫士出入君門由闈右不踐闕

○曲禮

君入

門介拂闈大夫中張與闈之間士介拂張賓入不中門

不履闕公事自闈西私事自闈東

○玉藻

凡為君使者

已受命君言不宿於家君言至則主人出拜君命之辱
使者歸則必拜送於門外若使人於君所則必朝服而
命之使者反則必下堂而受命振書端書於君前有
誅倒筴側龜於君前有誅龜筴几杖席蓋重素衿絺綌
不入公門苞履扱衽厭冠不入公門書方衰凶器不以
告不入公門君子行禮不求變俗祭祀之禮居喪之
服哭泣之位皆如其國之故謹修其法而審行之去國
三世爵祿有列於朝出入有詔於國若兄弟宗族猶存

則反告於宗後去國三世爵祿無列於朝出入無詔於國唯興之日從新國之法 大夫士去國踰竟為壇位鄉國而哭素衣素裳素冠徹緣鞮屨素箴乘髦馬不蚤鬻不祭食不說人以無罪婦人不當御三月而復服

大夫私行出疆必請反必有獻士私行出疆必請反必告君勞之則拜問其行拜而后對 國君去其國止之曰奈何去社稷也大夫曰奈何去宗廟也士曰奈何去墳墓也國君死社稷大夫死衆士死制 君天下曰天

子朝諸侯分職受政任功曰予一人踐阼臨祭祀內事
曰孝王某外事曰嗣王某臨諸侯畛於鬼神曰有天王
某甫崩曰天王崩復曰天子復矣告喪曰天王登假措
之廟立之主曰帝天子未除喪曰予小子生名之死亦
名之 天子建天官先六大曰大宰大宗大史大祝大
士大卜典司六典天子之五官曰司徒司馬司空司士
司寇典司五衆天子之六府曰司土司木司水司草司
器司貨典司六職天子之六工曰土工金工石工木工

獸工草工典制六材五官致貢曰享五官之長曰伯是
職方其擯於天子也曰天子之吏天子同姓謂之伯父
異姓謂之伯舅自稱於諸侯曰天子之老於外曰公於
其國曰君九州之長入天子之國曰牧天子同姓謂之
叔父異姓謂之叔舅於外曰侯於其國曰君其在東夷
北狄西戎南蠻雖大曰子於內自稱曰不穀於外自稱
曰王老庶方小侯入天子之國曰某人於外曰子自稱
曰孤 諸侯見天子曰臣某侯某其與民言自稱曰寡

人其在凶服曰適子孤臨祭祀內事曰孝子某侯某外
事曰曾孫某侯某死曰薨復曰某甫復矣既葬見天子

曰類見言謚曰類

○曲禮

凡自稱天子曰予一人伯曰

天子之力臣諸侯之於天子曰某土之守臣某其在邊
邑曰某屏之臣某其於敵以下曰寡人小國之君曰孤

擯者亦曰孤

○玉藻

國君不名卿老世婦大夫不名世

臣姪娣士不名家相長妾君大夫之子不敢自稱曰
余小子大夫士之子不敢自稱曰嗣子某不敢與世子

同名 天子不言出諸侯不生名君子不親惡諸侯失

地名滅同姓名

禮○曲

天子存二代之後猶尊賢也尊

賢不過二代 諸侯不臣寓公故古者寓公不繼世

君之南鄉答陽之義也臣之北面答君也大夫之臣不

稽首非尊家臣以辟君也

○郊特牲

父前子名君前臣名

○曲禮

請見不請退朝廷曰退燕遊曰歸師役曰罷

○少

儀

贊大行曰圭公九寸侯伯七寸子男五寸博三寸

厚半寸剡上左右各寸半玉也藻三采六等

○雜記

天

子搢珽方正於天下也諸侯荼前詘後直讓於天子也
大夫前詘後詘無所不讓也 笏天子以球玉諸侯以
象大夫以魚須文竹士竹本象可也見于天子與射無
說笏入太廟說笏非禮也小功不說笏當事免則說之
既搢必盥雖有執於朝弗有盥矣凡有指畫于君前用
笏造受命於君前則書于笏笏畢用也因飾焉笏度二
尺有六寸其中博三寸其殺六分而去一 天子玉藻
十有二旒前後邃延龍卷以祭玄端而朝日於東門之

外聽朔於南門之外閏月則闔門左扉立于其中皮弁以日視朝遂以食日中而餽奏而食日少牢朔月大牢五飲上水漿酒醴酏率食玄端而居動則左史書之言則右史書之御轡幾聲之上下年不順成則天子素服乘素車食無樂諸侯玄端以祭裨冕以朝皮弁以聽朔於大廟朝服以日視朝于內朝朝辨色始入君日出而視之退適路寢聽政使人視大夫大夫退然後適小寢釋服又朝服以食特牲三俎祭肺夕深衣祭牢肉朔

月少牢五俎四簋子卯稷食菜羹夫人與君同庖君無
故不殺牛大夫無故不殺羊士無故不殺犬豕君子遠
庖厨凡有血氣之類弗身踐也至于八月不雨君不舉
年不順成君衣布搢本關梁不租山澤列而不賦土功
不興大夫不得造車馬

○玉藻

諸侯無故不殺牛大夫

無故不殺羊士無故不殺犬豕庶人無故不食珍

○玉制

歲凶年穀不登君膳不祭肺馬不食穀馳道不除祭

事不縣大夫不食梁士飲酒不樂

○曲禮

國家靡敝則

車不雕幾甲不組滕食器不刻鏤君子不履絲屨馬不

常秣

儀○少

古者深衣蓋有制度以應規矩繩權衡短

無見膚長毋被土續紃鉤邊要縫半下袷之高下可以
運肘袂之長短反詘之及肘帶下毋厭髀上毋厭脅當
無骨者制十有二幅以應十有二月袂圓以應規曲袷
如矩以應方負繩及踝以應直下齊如權衡以應平故
規者行舉手以為容負繩抱方者以直其政方其義也
故易曰坤六二之動直以方也下齊如權衡者以安志

而平心也五法已施故聖人服之故規矩取其無私繩取其直權衡取其平故先王貴之故可以為文可以為武可以擯相可以治軍旅完且弗費善衣之次也具父母大父母衣純以續具父母衣純以青如孤子衣純以素純袂緣純邊廣各寸半

○深衣

朝玄端夕深衣深衣

三袂縫齊倍要袷當旁袂可以回肘長中繼揜尺袷二寸袷尺二寸緣廣寸半以帛裏布非禮也士不衣織無君者不貳采衣正色裳閒色非列采不入公門振絺綌

不入公門表裘不入公門襲裘不入公門 續為繭緇

為袍禪為絢帛為褶 唯君有黼裘以誓省大裘非古

也君衣狐白裘錦衣以裼之君之右虎裘厥左狼裘士

不衣狐白君子狐青裘豹褰玄綃衣以裼之麕裘青豸

褰絞衣以裼之羔裘豹飾緇衣以裼之狐裘黃衣以裼

之錦衣狐裘諸侯之服也犬羊之裘不裼不文飾也不

裼裘之裼也見美也弔則襲不盡飾也君在則裼盡飾

也服之襲也充美也是故尸襲執玉龜襲無事則裼弗

敢充也 禮不盛服不充故大裘不裼乘路車不式

天子素帶朱裏終辟而諸侯素帶終辟大夫素帶辟垂
士練帶率下辟居士錦帶弟子縞帶并紐約用組三寸
長齊于帶紳長制士三尺有司二尺有五寸 大夫大
帶四寸雜帶君朱綠大夫玄華士緇辟二寸再繚四寸
凡帶有率無箴功肆束及帶勤者有事則收之走則擁
之 韠君朱大夫素士爵韋園殺直天子直諸侯前後
方大夫前方後挫角士前後正韠下廣二尺上廣一尺

長三尺其頸五寸肩革帶博二寸一命縕黻幽衡再命

赤黻幽衡三命赤黻蔥衡

○玉藻

韠長三尺下廣二尺

上廣一尺會去上五寸紕以爵韋六寸不至下五寸純

以素紕以五采

○雜記

王后禕衣夫人揄狄君命屈狄

再命禕衣一命禕衣士緣衣唯世婦命於奠醢其他則

皆從男子童子之節也緇布衣錦緣錦紳并紐錦束

髮皆朱錦也童子不裘不帛不屨絢無總服聽事不麻

無事則立主人之北面見先生從人而入

○玉藻

衣服

在躬而不知其名爲罔儀

○少儀

古之君子必佩玉右徵

角左宮羽趨以采齊行以肆夏周還中規折還中矩進則揖之退則揚之然後玉鐃鳴也故君子在車則聞鸞和之聲行則鳴佩玉是以非辟之心無自入也君在不佩玉左結佩右設佩居則設佩朝則結佩齊則綰結佩而爵韞凡帶必有佩玉唯喪否佩玉有衝牙君子無故玉不去身君子於玉比德焉天子佩白玉而玄組綬公侯佩山玄玉而朱組綬大夫佩水蒼玉而純組綬世子

佩瑜玉而綦組綬士佩璫玟而緼組綬藻○玉

君無故

玉不去身大夫無故不徹縣士無故不徹琴瑟○曲禮

君子之居恒當戶寢恒東首若有疾風迅雷甚雨則必變雖夜必興衣服冠而坐日五盥沐稷而饋梁櫛用櫛櫛髮晞用象櫛進襪進羞工乃升歌浴用二巾上絺下絺出扞履蒯席連用湯履蒲席衣布晞身乃屨進飲將適公所宿齋戒居外寢沐浴史進象笏書思對命既服習容觀玉聲乃出揖私朝輝如也登車則有光矣君

與尸行接武大夫繼武士中武徐趨皆用是疾趨則欲
發而手足毋移圈豚行不舉足齊如流席上亦然端行
頤雷如矢弁行刻刻起屨執龜玉舉前曳踵蹢躅如也
凡行容惕惕廟中齊齊朝中濟濟翔翔君子之容舒
遲見所尊者齊遯足容重手容恭目容端口容止聲容
靜頭容直氣容肅立容德色容莊坐如尸燕居告溫溫
凡祭容貌顏色如見所祭者喪容纍纍色容顛顛視容
瞿瞿梅梅言容繭繭戎容暨暨言容詬詬色容厲肅視

容清明立容辨卑毋譙頭頸必中山立時行盛氣顛實

揚休玉色

○玉藻

天子穆穆諸侯皇皇大夫濟濟士蹕

蹕庶人僬僬

○曲禮

言語之美穆穆皇皇朝廷之美濟

濟翔翔祭祀之美齊齊皇皇車馬之美匪翼翼鸞和

之美肅肅雍雍賓客主恭祭祀主敬喪事主哀會同

主詡軍旅思險隱情以虞

○少儀

喪事欲其縱縱爾吉

事欲其折折爾故喪事雖遽不陵節吉事雖止不怠故

騷騷爾則野鼎鼎爾則小人君子蓋猶猶爾

○檀弓

惟

薄之外不趨堂上不趨執玉不趨堂上接武堂下布武

室中不翔竝坐不橫肱授立不跪授坐不立○曲禮受

立授立不坐性之直者則有之矣 取俎進俎不坐執

虛如執盈入虛如有人 執玉執龜策不趨堂上不趨

城上不趨武車不式介者不拜○少儀 介者不拜為其

拜而菱拜 適墓不登壟助葬必執紼臨喪不笑揖人

必違其位望柩不歌入臨不翔當食不歎鄰有喪舂不

相里有殯不巷歌適墓不歌哭日不歌送喪不由徑送

葬不辟塗潦臨喪則必有哀色執紼不笑臨樂不歎介
冑則有不可犯之色故君子戒慎不失色於人公庭
不言婦女公事不私議將適舍求母固將上堂聲
必揚戶外有二屨言聞則入言不聞則不入將入戶視
必下入戶奉扃視瞻母回戶開亦開戶闔亦闔有後入
者闔而勿遂母踐屨母踏席摠衣趨隅必慎唯諾離
坐離立母往參焉離立者不出中閒天子視不上於
衿不下於帶國君綏視大夫衡視士視五步凡視上於

面則教下於帶則憂傾則姦君命大夫與士肆在官言
官在府言府在庫言庫在朝言朝朝言不及犬馬輟朝
而顧不有異事必有異慮故輟朝而顧君子謂之固在
朝言禮問禮對以禮 擬人必於其倫問天子之年對
曰聞之始服衣若干尺矣問國君之年長曰能從宗廟
社稷之事矣幼曰未能從宗廟社稷之事也問大夫之
子長曰能御矣幼曰未能御也問士之子長曰能典謁
矣幼曰未能典謁也問庶人之子長曰能負薪矣幼曰

未能負薪也問國君之富數地以對山澤之所出問大夫之富曰有宰食力祭罷衣服不假問士之富以車數對問庶人之富數畜以對禮○曲

問國君之子長幼長則曰能從社稷之事矣幼則曰能御未能御問大夫之子長幼長則曰能從樂人之事矣幼則曰能正於樂人未能正於樂人問士之子長幼長則曰能耕矣幼則曰能負薪未能負薪問品味曰子亟食於某乎問道藝曰子習於某乎子善於某乎○少

弔喪弗能賻不問

其所費問疾弗能遺不問其所欲見人弗能館不問其所舍賜人者不曰來取與人者不問其所欲貧者不以貨財為禮老者不以筋力為禮人生十年曰幼學二十曰弱冠三十曰壯有室四十曰強而仕五十曰艾服官政六十曰耆指使七十曰老而傳八十九十曰耄七年曰悼悼與耄雖有罪不加刑焉百年曰期頤大夫七十而致事若不得謝則必賜之几杖行役以婦人適四方乘安車自稱曰老夫於其國則稱名越國而問焉

必告之以其制 年長以倍則父事之十年以長則兄事之五年以長則肩隨之羣居五人則長者必異席

謀於長者必操几杖以從之長者問不辭讓而對非禮也 侍於君子不顧望而對非禮也 幼子常視母誑

童子不衣裘裳立必正方不傾聽長者與之提携則兩手奉長者之手負劍辟咄詔之則掩口而對 從於先生不越路而與人言遭先生於道趨而進正立拱手先生與之言則對不與之言則趨而退從長者而上丘陵

則必鄉長者所視登城不指城上不呼 侍坐於先生
先生問焉終則對請業則起請益則起父召無諾先生
召無諾唯而起 侍坐於君子君子問更端則起而對
侍坐於君子若有告者曰少閒願有復也則左右屏而
待毋側聽毋噉應毋淫視毋怠荒遊毋倨立毋跛坐毋
箕寢毋伏斂髮毋髡冠毋免勞毋袒暑毋褰裳 先生
書策琴瑟在前坐而遷之戒勿越虛坐盡後食坐盡前
坐必安執爾顏長者不及毋僂言正爾容聽必恭毋勦

說母雷同必則古昔稱先王禮○曲

尊長於已踰等不

敢問其年燕見不將命遇於道見則面不請所之喪俟
事不植弔侍坐弗使不執琴瑟不畫地手無容不嬰也
寢則坐而將命侍射則約矢侍投則擁矢勝則洗而以
請客亦如之不角不擢馬儀○少

侍坐於長者屨不上

於堂解屨不敢當階就屨跪而舉之屏於側鄉長者而
屨跪而遷屨俯而納屨凡為長者糞之禮必加帚于
箕上以袂拘而退其塵不及長者以箕自鄉而扱之奉

席如橋衡請席何鄉請衽何趾席南鄉北鄉以西方為

上東鄉西鄉以南方為上

○曲禮

汜埽曰埽埽席前曰

拊拊席不以鬣執箕膺搗

○少儀

侍坐於所尊敬無餘

席見同等不起燭至起食至起上客起燭不見跋尊客

之前不叱狗讓食不唾

○曲禮

侍食於先生異爵者後

祭先飯客祭主人辭曰不足祭也客飧主人辭以疏主

人自置其醬則客自徹之一室之人非賓客一人徹壹

食之人一人徹凡燕食婦人不徹食棗桃李弗致于核

瓜祭上環食中棄所操凡食果實者後君子火孰者先
君子凡侑食不盡食食於人不飽唯水漿不祭若祭
為己倖卑

藻○玉

侍食於長者主人親饋則拜而食主

人不親饋則不拜而食共食不飽共飯不澤手毋搏飯
毋放飯毋流歠毋啗食毋齧骨毋反魚肉毋投與狗骨
毋固獲毋揚飯飯黍毋以箸毋嘔羹毋絮羹毋刺齒毋
歠醢客絮羹主人辭不能亨客歠醢主人辭以窶濡肉
齒決乾肉不齒決毋嘬炙卒食客自前跪徹飯齊以授

相者主人興辭於客然後客坐侍飲於長者酒進則起
拜受於尊所長者辭少者反席而飲長者舉未釂少者
不敢飲長者賜少者賤者不敢辭賜果於君前其有核
者懷其核御食於君君賜餘器之溉者不寫其餘皆寫
御同於長者雖貳不辭偶坐不辭羹之有菜者用

挾其無菜者不用挾禮

○曲

燕侍食於君子則先飯而

後已毋放飯毋流歎小飯而亟之數噍毋為口容客自
徹辭焉則止羞濡魚者進尾冬右腴夏右鰭祭膾

凡齊執之以右居之於左贊幣自左詔辭自右 酌尸
之僕如君之僕其在車則左執轡右受爵祭左右執范
乃飲 凡羞有俎者則於俎內祭君子不食圉腴小子
走而不趨舉爵則坐祭立飲凡洗必盥牛羊之肺離而
不提心凡羞有湑者不以齊為君子擇蔥薤則絕其本
末羞首者進喙祭耳尊者以酌者之左為上尊尊壺者
面其鼻飲酒者襍者醺者有折俎不坐未步爵不嘗羞
其有折俎者取祭反之不坐燔亦如之尸則坐 其

未有燭而後至者則以在者告道瞽亦然凡飲酒為獻
主者執燭抱燋客作而辭然後以授人執燭不讓不辭
不歌洗盥執食飲者勿氣有問焉則辟呬而對○少儀

凡進食之禮左殽右載食居人之左羹居人之右膾炙
處外醯醬處內蔥蒜處末酒漿處右以脯脩置者左胸
右末客若降等執食興辭主人興辭於客然後客坐主
人延客祭祭食祭所先進殽之序徧祭之三飯主人延
客食載然後辯殽主人未辯客不虛口○曲禮飯黍稷

稻梁白黍黃梁稭稊 膳腳臄曉醢牛炙醢牛
膾羊炙羊臠醢豕炙醢豕臠芥醬魚膾雉兔鶉鷄 飲
重醴稻醴清糟黍醴清糟梁醴清糟或以醢為醴黍醢
漿水醢濫 酒清白 羞糗餌粉醢 食蜎醢而苽食
雉羹麥食脯羹雞羹折稊犬羹兔羹和糝不麥濡豚包
苦實蓼濡雞醢醬實蓼濡魚卵醬實蓼濡鼈醢醬實蓼
股脩蚺醢脯羹兔醢麋膚魚醢魚膾芥醬麋腥醢醬桃
諸梅諸卵鹽 凡食齊視春時羹齊視夏時醬齊視秋

時飲齊視冬時凡和春多酸夏多苦秋多辛冬多鹹調
以滑甘 牛宜稌羊宜黍豕宜稷犬宜粱鴈宜麥魚宜
牀 春宜羔豚膳膏薌夏宜牀鱗膳膏臊秋宜犢麋膳
膏腥冬宜鮮羽膳膏羶 牛脩鹿脯田豕脯麋脯麇脯
麋鹿田豕麇皆有軒雉兔皆有芼爵鷄蜩范芝栢蒨楨
棗栗榛柿瓜桃李梅杏楂梨薑桂 大夫燕食有膾無
脯有脯無膾士不貳羹庶人耆老不徒食 膾春用
蔥秋用芥豚春用韭秋用蓼脂用蔥膏用醢三牲用藪

和用醢獸用梅鶩羹雞羹鴛鴦之蓼魴鱖烝雛燒雉薺
無蓼 不食雛鼈狼去腸狗去腎狸去正脊兔去尻狐
去首豚去腦魚去乙鼈去醜 肉曰脫之魚曰作之棗
曰新之粟曰撰之桃曰膽之柰梨曰攢之 牛夜鳴則
廂羊冷毛而毳羶狗赤股而躁臊鳥鵲色而沙鳴鬱豕
望視而交睫腥馬黑脊而般臂漏雛尾不盈握弗食舒
鴈翠鵠鴉胖舒鳧翠雞肝鴈腎鵠奧鹿胃 肉腥細者
為膾大者為軒或曰麋鹿魚為菹麇為辟雞野豕為軒

兔為宛脾切蔥若薤實諸醢以柔之羹食自諸侯以下至於庶人無等大夫無秩膳大夫七十而有閣天子之閣左達五右達五公侯伯於房中五大夫於閣三士於坵一淳熬煎醢加於陸稻上沃之以膏曰淳熬

淳母煎醢加于黍食上沃之以膏曰淳母炮取豚若將剗之剗之實棗於其腹中編萑以苴之塗之以謹塗炮之塗皆乾擘之濯手以摩之去其皽為稻粉糝溲之以為酏以付豚煎諸膏膏必滅之鉅鑊湯以小鼎薌脯

於其中使其湯毋滅鼎三日三夜毋絕火而后調之以
醢醢 擣珍取牛羊麋鹿麇之肉必胾每物與牛若一
捶反側之去其餌孰出之去其皽柔其肉 漬取牛肉
必新殺者薄切之必絕其理湛諸美酒期朝而食之以
醢若醢醢 為熬捶之去其皽編萑布牛肉焉屑桂與
薑以灑諸上而鹽之乾而食之施羊亦如之施麋施鹿
施麇皆如牛羊欲濡肉則釋而煎之以醢欲乾肉則捶
而食之 肝膋取狗肝一幪之以其膋濡炙之舉燂其

膾不蓼 糝取牛羊豕之肉三如一小切之與稻米稻

米二肉一合以為餌煎之 取稻米舉糝漉之小切狼

臠膏以與稻米為醢

○內則

牛與羊魚之腥臠而切之

為膾麋鹿為菹野豕為軒皆臠而不切麋為辟雞兔為

宛脾皆臠而切之切蔥若薤實之醢以柔之

○少儀

為

天子削爪者副之巾以絺為國君者華之巾以綌為大

夫累之士薺之庶人齧之

○曲禮

君將適他臣如致金

玉貨貝於君則曰致馬資於有司敵者曰贈從者

○少儀

士有獻於國君他日君問之曰安取彼再拜稽首而

后對

禮○曲

大夫有獻弗親君有賜不面拜為君之答

已也

特牲○郊

有慶非君賜不賀君賜車馬乘以拜賜

衣服服以拜賜君未有命弗敢即乘服也君賜稽首據
掌致諸地酒肉之賜弗再拜凡賜君子與小人不同
日凡獻于君大夫使宰士親皆再拜稽首送之膳於
君有葷挑芻於大夫去芻於士去葷皆造於膳宰大夫
不親拜為君之答已也大夫拜賜而退士待諾而退又

拜弗答拜大夫親賜士士拜受又拜於其室衣服弗服以拜敵者不在拜於其室凡於尊者有獻而弗敢以聞

藻○玉

水潦降不獻魚鼈獻鳥者佛其首畜鳥者則勿佛也獻車馬者執策綏獻甲者執冑獻杖者執末獻民虜者操右袂獻粟者執右契獻米者操量鼓獻熟食者操醬齊獻田宅者操書致凡遺人弓者張弓尚筋弛弓尚角右手執簫左手承弣尊卑垂帨若主人拜則客還辟辟拜主人自受由客之左接下承弣鄉與客竝然後

受進劍者左首進戈者前其鎛後其刃進矛戟者前其
鍬進几杖者拂之效馬效羊者右牽之效犬者左牽之
執禽者左首飾羔鴈者以績受珠玉者以摠受弓劍者
以袂飲玉爵者弗揮凡以弓劍苞苴簞笥問人者操以
受命如使之容

○曲禮

其以乘壺酒束脩一犬賜人若

獻人則陳酒執脩以將命亦曰乘壺酒束脩一犬其以
鼎肉則執以將命其禽加於一雙則執一雙以將命委
其餘犬則執縶守犬田犬則授擯者既受乃問犬名牛

則執紼馬則執勒皆右之臣則左之車則說綏執以將
命甲若有以前之則執以將命無以前之則袒纁奉冑
器則執蓋弓則以左手屈韞執弣劍則啓櫝蓋襲之加
夫褱與劍焉笏書脩苞苴弓茵席枕几頴杖琴瑟戈有
刃者櫝篋籥其執之皆尚左手刀卻刃授頴削授拊凡
有刺刃者以授人則辟刃儀○少未仕者不稅人如稅
人則以父兄之命○檀弓士於大夫不承賀下大夫於
上大夫承賀○玉藻君車將駕則僕執策立於馬前已

駕僕展軫效駕奮衣由右上取貳綏跪乘執策分轡驅之五步而立君出就車則僕并轡授綏左右攘辟驅車而騶至于大門君撫僕之手而顧命車右就車門閭溝渠必步凡僕人之禮必授人綏若僕者降等則受不然則否若僕者降等則撫僕之手不然則自下拘之客車不入大門婦人不立乘犬馬不上於堂故君子式黃髮下卿位入國不馳入里必式君命召雖賤人大夫士必自御之祥車曠左乘君之乘車不敢曠左左必式

僕御婦人則進左手後右手御國君則進右手後左手而俯國君不乘奇車車上不廣欬不妄指立視五雋式視馬尾顧不過轂國中以策彗卹勿驅塵不出軌國君下齊牛式宗廟大夫士下公門式路馬乘路馬必朝服載鞭策不敢授綏左必式步路馬必中道以足蹙路馬芻有誅齒路馬有誅

○曲禮

路馬死埋之以帷

○檀弓

執君之乘車則坐僕者右帶劒負良綏申之面拖諸臂以散綏升執轡然後步僕於君子君子升下則授綏

始乘則式君子下行然後還立乘貳車則式佐車則否
貳車者諸侯七乘上大夫五乘下大夫三乘有貳車之
乘馬服車不齒觀君子之衣服服劔乘馬弗賈乘兵
車出先刃入後刃軍尚左卒尚右儀○少君羔辟虎植

大夫齊車鹿辟豹植朝車士齊車鹿辟豹植○玉國藻

君撫式大夫下之大夫撫式士下之禮不下庶人刑不
上大夫刑人不在君側兵車不式武車綏旌德車結
旌史載筆士載言前有水則載青旌前有塵埃則載

鳴鳶前有車騎則載飛鴻前有士師則載虎皮前有摯獸則載貔貅行前朱鳥而後玄武左青龍而右白虎招搖在上急繕其怒進退有度左右有局各司其局 外事以剛日內事以柔日凡卜筮日旬之外曰遠某日旬之內曰近某日喪事先遠日吉事先近日曰為日假爾泰龜有常假爾泰筮有常卜筮不過三卜筮不相襲龜為卜筮為筮卜筮者先聖王之所以使民信時日敬鬼神畏法令也所以使民決嫌疑定猶豫也故曰疑而筮

之則弗非也日而行事則必踐之○曲禮卜人定龜史

定墨君定體○玉藻不貳問問卜筮曰義與志與義則

可問志則否○儀禮昔者聖人建陰陽天地之情立以

為易易抱龜南面天子卷冕北面雖有明知之心必進

斷其志焉示不敢專以尊天也善則稱人過則稱己教

不伐以尊賢也○祭義天子諸侯無事則歲三田一為

乾豆二為賓客三為充君之庖無事而不田曰不敬田

不以禮曰暴天物天子不合圍諸侯不掩羣天子殺則

下大綏諸侯殺則下小綏大夫殺則止佐車佐車止則百姓田獵獺祭魚然後虞人入澤梁豺祭獸然後田獵鳩化為鷹然後設罝羅草木零落然後入山林昆蟲未蟄不以火田不麝不卵不殺胎不殀天不覆巢

○王制

國君春田不圍澤大夫不掩羣士不取麝卵

○曲禮

內則

禮記后王命冢宰降德於衆兆民子事父母雞初鳴咸盥漱櫛縱笄總拂髦冠緌纓端韞紳搢笏左右佩用左

佩紛悅刀礪小觶金燧右佩玦捍管籥大觶木燧偃屨
著綦婦事舅姑如事父母雞初鳴咸盥漱擲紕筭總衣
紳左佩紛悅刀礪小觶金燧右佩箴管線續施繫袞大
觶木燧衿纓綦屨以適父母舅姑之所及所下氣怡聲
問衣燠寒疾痛苛癢而敬抑搔之出入則或先或後而
敬扶持之進盥少者奉槃長者奉水請沃盥盥卒授巾
問所欲而敬進之柔色以溫之饔飩酒醴芼羹菽麥蕡
稻黍粱稊唯所欲棗栗飴蜜以甘之苾苴枌榆兔薨滫

澹以滑之脂膏以膏之父母舅姑必嘗之而後退男
女未冠笄者雞初鳴咸盥漱櫛緹拂髦總角衿纓皆佩
容臭昧爽而朝問何食飲矣若已食則退若未食則佐
長者視具凡內外雞初鳴咸盥漱衣服歛枕簟灑埽
室堂及庭布席各從其事孺子蚤寢晏起唯所欲食無
時由命士以上父子皆異宮昧爽而朝慈以旨甘日出
而退各從其事日入而夕慈以甘旨父母舅姑將坐
奉席請何鄉將社長者奉席請何趾少者執牀與坐御

者舉几斂席與簞縣衾篋枕斂簞而襦之父母舅姑之
衣衾簞席枕几不傳杖屨祇敬之勿敢近敦牟卮匱非
餽莫敢用與恒食飲非餽莫之敢飲食父母在朝夕恒
食子婦佐餽既食恒餽父沒母存冢子御食羣子婦佐
餽如初旨甘柔滑孺子餽在父母舅姑之所有命之
應唯敬對進退周旋慎齊升降出入揖遊不敢噦噫噉
咳欠伸跛倚睇視不敢唾涕寒不敢襲瘡不敢搔不有
敬事不敢袒裼不涉不擗褻衣衾不見裏父母唾涕不

見冠帶垢和灰請漱衣裳垢和灰請澣衣裳綻裂紉箴請補綴五日則燂湯請浴三日具沐其閒面垢燂潘請澣足垢燂湯請洗少事長賤事貴共帥時則○內凡為

人子之禮冬溫而夏清昏定而晨省在醜夷不爭夫為人子者三賜不及車馬故州閭鄉黨稱其孝也兄弟親戚稱其慈也僚友稱其弟也執友稱其仁也交遊稱其信也見父之執不謂之進不敢進不謂之退不敢退不問不敢對此孝子之行也夫為人子者出必告反必

面所遊必有常所習必有業恒言不稱老 為人子者
居不主奧坐不中席行不中道立不中門食饗不為概
祭祀不為尸聽於無聲視於無形不登高不臨深不苟
訾不苟笑孝子不服闇不登危懼辱親也父母存不許
友以死不有私財 為人子者父母存冠衣不純素孤
子當室冠衣不純采○曲禮 親在行禮於人稱父人或
賜之則稱父拜之 父命呼唯而不諾手執業則投之
食在口則吐之走而不趨親老出不易方復不過時親

瘠色容不盛此孝子之疏節也父沒而不能讀父之書
手澤存焉爾母沒而杯圈不能飲焉口澤之氣存焉爾

藻○玉

世子之記曰朝夕至於大寢之門外問於內豎
曰今日安否何如內豎曰今日安世子乃有喜色其有
不安節則內豎以告世子世子色憂不滿容內豎言復
初然後亦復初朝夕之食上世子必在視寒煖之節食
下問所膳羞必知所進以命膳宰然後退若內豎言疾
則世子親齊立而養膳宰之饌必敬視之疾之藥必親

嘗之嘗饌善則世子亦能食嘗饌寡世子亦不能飽以

至于復初然後亦復初

○文王世子

父母有疾冠者不櫛

行不翔言不惰琴瑟不御食肉不至變味飲酒不至變

貌笑不至矧怒不至詈疾止復故有憂者側席而坐有

喪者專席而坐子於父母則自名也

○曲禮

子婦孝

者敬者父母舅姑之命勿逆勿怠若飲食之雖不耆必

嘗而待加之衣服雖不欲必服而待加之事人代之已

雖弗欲姑與之而姑使之而後復之子婦有勤勞之事

雖甚愛之姑縱之而寧數休之子婦未孝未敬勿庸疾
怨姑教之若不可教而後怒之不可怒子放婦出而不
表禮焉父母有過下氣怡色柔聲以諫諫若不入起敬起
孝說則復諫不說與其得罪於鄉黨州閭寧孰諫父母
怒不說而撻之流血不敢疾怨起敬起孝 父母有婢

子若庶子庶孫甚愛之雖父母沒沒身敬之不衰子有
二妾父母愛一人焉子愛一人焉由衣服飲食由執事母
敢視父母所愛雖父母沒不衰子甚宜其妻父母不說

出子不宜其妻父母曰是善事我子行夫婦之禮焉沒

身不衰則

○內

父之讎弗與共戴天兄弟之讎不反兵交

遊之讎不同國

○曲禮

父母雖沒將為善思貽父母令

名必果將為不善思貽父母羞辱必不果舅沒則姑老

冢婦所祭祀賓客每事必請於姑介婦請於冢婦舅姑

使冢婦毋怠不友無禮於介婦舅姑若使介婦毋敢敵

耦於冢婦不敢並行不敢並命不敢並坐凡婦不命適

私室不敢退婦將有事亦必請於舅姑子婦無私貨

無私畜無私器不敢私假不敢私與婦或賜之飲食衣服布帛佩悅蒞蘭則受而獻諸舅姑舅姑受之則喜如新受賜若反賜之則辭不得命如更受賜藏以待之婦若有私親兄弟將與之則必復請其故賜而后與之

適子庶子祇事宗子宗婦雖富貴不敢以富貴入宗子之家雖衆車徒舍於外以寡約入子弟猶歸器衣服裘衾車馬則必獻其上而後敢服用其次也若非所獻則不敢以入於宗子之門不敢以富貴加於父兄宗族若

富則具二牲獻其賢者於宗子夫婦皆齊而宗敬焉終
事而后敢私祭則○內

夫晝居於內問其疾可也夜居

於外弔之可也是故君子非有大故不宿於外非致齊

也非疾也不晝夜居於內○檀

男不言內女不言外

非祭非喪不相授器其相授則女受以篚其無篚則皆

坐奠之而后取之外內不共井不共湔浴不通寢席不

通乞假男女不通衣裳內言不出外言不入男子入內

不嘯不指夜行以燭無燭則止女子出門必擁蔽其面

夜行以燭無燭則止道路男子由右女子由左則○內

男女不雜坐不同櫬枷不同巾櫛不親授嫂叔不通問
諸母不漱裳外言不入於梱內言不出於梱女子許嫁
纓非有大故不入其門姑姊妹女子子已嫁而反兄弟
弗與同席而坐弗與同器而食父子不同席寡婦之
子非有見焉弗與為友○禮始於謹夫婦為宮室
辨外內男子居外女子居內深宮固門閭寺守之男不
入女不出男女不同櫬枷不敢縣於夫之揮櫬不敢藏

於夫之篋笥不敢共溷浴夫不在斂枕篋簟席褥罷而藏之少事長賤事貴咸如之夫婦之禮唯及七十同藏無閒故妾雖老年未滿五十必與五日之御將御者齋漱澣慎衣服櫛縱笄總角拂髦衿纓綦屨雖婢妾衣服飲食必後長者妻不在妾御莫敢當夕妻將生子及月辰居側室夫使人日再問之作而自問之妻不敢見使姆衣服而對至于子生夫復使人日再問之夫齊則不入側室之門子生男子設弧于門左女子設帨于門

右三日始負子男射女否國君世子生告于君接以大牢宰掌具三日卜士負之吉者宿齊朝服寢門外詩負之射人以桑弧蓬矢六射天地四方保受乃負之宰醴負子賜之束帛卜士之妻大夫之妾使食子凡接子擇日冢子以大牢庶人特豚士特豕大夫少牢國君世子大牢其非冢子則皆降一等異為孺子室於宮中擇於諸母與可者必求其寬裕慈惠溫良恭敬慎而寡言者使為子師其次為慈母其次為保母皆居子室他人無事不往

三月之未擇日翦髮為髻男角女羈否則男左女右是日也妻以子見於父貴人則為衣服由命士以下皆澣澣男女夙興沐浴衣服具視朔食夫入門升自阼階立于阼西鄉妻抱子出自房當楣立東面姆先相曰母某敢用時日祇見孺子夫對曰欽有帥父執子之右手咳而名之妻對曰記有成遂左還授師子師辯告諸婦諸母名妻遂適寢夫告宰名宰辯告諸男名書曰某年某月某日某生而藏之宰告閭史閭史書為二其一藏諸

閭府其一獻諸州史州史獻諸州伯州伯命藏諸州府
夫人食如養禮世子生則君沐浴朝服夫人亦如之皆
立于阼階西鄉世婦抱子升自西階君名之乃降適子
庶子見于外寢撫其首咳而名之禮帥初無辭凡名子
不以日月不以國不以隱疾大夫士之子不敢與世子

同名○內

名子者不以國不以日月不以隱疾不以

山川

○曲禮

大戴禮記青史氏之記曰古者胎教王

持升而御戶右比及三月者王后所求聲音非禮樂則
太師緼瑟而稱不習所求滋味者非正味則太宰倚升

而言曰不敢以待王太子太子生而泣太師吹銅曰聲中某律太宰曰滋味上某然後卜名上無取於天下無難知而墜中無取於名山通谷無拂於鄉俗是故君子名負之有司參夙興端冕見之南郊見之天也過闕則下過廟則趨孝子之道故自為赤子時教固以行矣○係

傳

妾將生子及月辰夫使人日一問之子生三月之

末漱澣夙齋見於內寢禮之如始入室君已食徹焉使之特餽遂入御公庶子生就側室三月之末其母沐浴朝服見於君擯者以其子見君有所賜君名之衆子則使有司名之庶人無側室者及月辰夫出居羣室其間

之也與子見父之禮無以異也 凡父在孫見于祖祖亦名之禮如子見父無辭 食子者三年而出見於公宮則劬大夫之子有食母士之妻自養其子 由命士以上及大夫之子旬而見冢子未食而見必執其右手適子庶子已食而見必循其首 子能食食教以右手能言男唯女俞男顰革女顰絲六年教之數與方名七年男女不同席不共食八年出入門戶及即席飲食必後長者始教之讓九年教之數日十年出就外傳居宿

于外學書計衣不帛襦袴禮帥初朝夕學幼儀請肄簡
諒十有三年學樂誦詩舞勺成童舞象學射御二十而
冠始學禮可以衣裘帛舞大夏敦行孝弟博學不教內
而不出三十而有室始理男事博學無方孫友視志四
十始仕方物出謀發慮道合則服從不可則去五十命
為大夫服官政七十致事凡男拜尚左手○內則大戴禮記古者
年八歲而出就外舍學小藝焉履小節焉束髮而就大
學學大藝焉履大節焉居則習禮文行則鳴佩玉升車
則聞和鸞之聲是以非僻之心無自入也故孩提三公
三少固明孝仁禮義以導習之也逐去邪人不使見惡

行於是比選天下端士孝弟開博有道術者以輔翼之
使之與太子居處出入故太子乃日見正事聞正言行
正道左視右視前後皆正人夫習與正人居不能不正
也猶生長於楚不能不楚言也故擇其所嗜必先受業
乃得嘗之擇其所樂必先有習乃得為之及太子少長
妃色則入於小學小者所學之宮也及太子既冠成人
免於保傅之嚴則有司過之史有徹膳之宰太子
有過史必書之史之義不得不書過不書過則死過書
而宰徹去膳夫膳宰之義不得不徹膳不徹膳則死於
是有進善之令有誹謗之木有敢諫之鼓瞽史誦詩工
誦正諫士傳民語習於智長故切而
不振化與心成故中道若性○保傅

女子十年不出

姆教婉婉聽從執麻枲治絲繭織紵組紃學女事以共
衣服觀於祭祀納酒漿籩豆菹醢禮相助奠十有五年

而笄二十而嫁有故二十三年而嫁聘則為妻奔則為

妾凡女拜尚右手

○內則

婦人吉事雖有君賜肅拜為

尸坐則不手拜肅拜為喪主則不手拜

○少儀

教學養老

禮記凡學世子及學士必時春夏學干戈秋冬學羽籥
皆於東序小樂正學干大胥贊之籥師學戈籥師承贊
之胥鼓南春誦夏弦大師詔之瞽宗秋學禮執禮者詔
之冬讀書典書者詔之禮在鼓宗書在上庠凡祭與養

老乞言合語之禮皆小樂正詔之於東序大樂正學舞
干戚語說命乞言皆大樂正授數大司成論說在東序
凡侍坐於大司成者遠近閒三席可以問終則負牆列
事未盡不問凡學春官釋奠於其先師秋冬亦如之凡
始立學者必釋奠於先聖先師及行事必以幣凡釋奠
者必有合也有國故則否凡大合樂必遂養老凡語于
郊者必取賢斂才焉或以德進或以事舉或以言揚曲
藝皆誓之以待又語三而一有焉乃進其等以其序謂

之郊人遠之於成均以及取爵於上尊也始立學者既興罷用幣然後釋菜不舞不授器乃退儼於東序一獻無介語可也 凡三王教世子必以禮樂樂所以修內也禮所以修外也禮樂交錯於中發形於外是故其成也懌恭敬而溫文立大傳少傳以養之欲其知父子君臣之道也大傳審父子君臣之道以示之少傳奉世子以觀大傳之德行而審喻之大傳在前少傳在後入則有保出則有師是以教喻而德成也師也者教之以事

而喻諸德者也保也者慎其身以輔翼之而歸諸道者也記曰虞夏商周有師保有疑丞設四輔及三公不必備唯其人語使能也君子曰德德成而教尊教尊而官正官正而國治君之謂也天子視學大昕鼓徵所以警衆也衆至然後天子至乃命有司行事興秩節祭先師先聖焉有司率事反命始之養也適東序釋奠於先老遂設三老五更羣老之席位焉適饌省醴養老之珍具遂發咏焉退修之以孝養也反登歌清廟既歌而語

以成之也言父子君臣長幼之道合德音之致禮之大者也下管象舞大武大合衆以事達有神興有德也正君臣之位貴賤之等焉而上下之義行矣有司告以樂闕王乃命公侯伯子男及羣吏曰反養老幼於東序終之以仁也是故聖人之記事也慮之以大愛之以敬行之以禮脩之以孝養紀之以義終之以仁是故古之人一舉事而衆皆知其德之備也古之君子舉大事必慎其終始而衆安得不喻焉兌命曰念終始典于學

○文王世

子發慮憲求善良足以腹聞不足以動衆就賢體遠足以動衆未足以化民君子如欲化民成俗其必由學乎玉不琢不成器人不學不知道是故古之王者建國君民教學為先兌命曰念終始典于學其此之謂乎雖有嘉肴弗食不知其旨也雖有至道弗學不知其善也是故學然後知不足教然後知困知不足然後能自反也知困然後能自強也故曰教學相長也兌命曰學學半其此之謂乎古之教者家有塾黨有庠術有序

國有學比年入學中年考校一年視離經辨志三年視敬業樂羣五年視博習親師七年視論學取友謂之小成九年知類通達強立而不反謂之大成夫然後足以化民易俗近者說服而遠者懷之此大學之道也記曰蛾子時術之其此之謂乎大學始教皮弁祭菜示敬道也宵雅肄三官其始也入學鼓篋孫其業也夏楚二物收其威也未卜禘不視學游其志也時觀而弗語存其心也幼者聽而弗問學不躡等也此七者教之大倫

也記曰凡學官先事士先志其此之謂乎大學之教也
時教必有正業退息必有居學不學操縵不能安弦不
學博依不能安詩不學雜服不能安禮不興其藝不能
樂學故君子之於學也藏焉脩焉息焉遊焉夫然故安
其學而親其師樂其友而信其道是以雖離師輔而不
反也兌命曰敬孫務時敏厥修乃來其此之謂乎今之
教者呻其佔畢多其訊言及于數進而不顧其安使人
不由其誠教人不盡其材其施之也悖其求之也佛夫

然故隱其學而疾其師苦其難而不知其益也雖終其業其去之必速教之不刑其此之由乎 大學之法禁於未發之謂豫當其可之謂時不陵節而施之謂孫相觀而善之謂摩此四者教之所由興也發然後禁則扞格而不勝時過然後學則勤苦而難成雜施而不孫則壞亂而不修獨學而無友則孤陋而寡聞燕朋逆其師燕辟廢其學此六者教之所由廢也君子既知教之所由興又知教之所由廢然後可以為人師也故君子之

教喻也道而弗牽強而弗抑開而弗達道而弗牽則和
強而弗抑則易開而弗達則思和易以思可謂善喻矣
學者有四失教者必知之人之學也或失則多或失則
寡或失則易或失則止此四者心之莫同也知其心然
後能救其失也教也者長善而救其失者也善歌者使
人繼其聲善教者使人繼其志其言也約而達微而臧
罕譬而喻可謂繼志矣君子知至學之難易而知其美
惡然後能博喻能博喻然後能為師能為師然後能為

長能為長然後能為君故師也者所以學為君也是故
擇師不可不慎也記曰三王四代唯其師其此之謂乎
凡學之道嚴師為難師嚴然後道尊道尊然後民知
敬學是故君之所不臣於其臣者二當其為尸則弗臣
也當其為師則弗臣也大學之禮雖詔於天子無北面
所以尊師也善學者師逸而功倍又從而庸之不善學
者師勤而功半又從而怨之善問者如攻堅木先其易
者後其節目及其久也相說以解不善問者反此善待

問者如撞鐘叩之以小者則小鳴叩之以大者則大鳴
待其從容然後盡其聲不善答問者反此此皆進學之
道也記問之學不足以為人師必也其聽語乎力不能
問然後語之語之而不知雖舍之可也 良冶之子必
學為裘良弓之子必學為箕始駕馬者反之車在馬前
君子察於此三者可以有志於學矣 古之學者比物
醜類鼓無當於五聲五聲弗得不和水無當於五色五
色弗得不章學無當於五官五官弗得不治師無當於

五服五服弗得不親 君子曰大德不官大道不器大信不約大時不齊察於此四者可以有志於本矣三王之祭川也皆先河而後海或源也或委也此之謂務本

○學記

凡養老有虞氏以燕禮夏后氏以饗禮殷人以食禮周人修而兼用之五十養於鄉六十養於國七十養於學達於諸侯八十拜君命一坐再至瞽亦如之九十使人受五十異粢六十宿肉七十貳膳八十常珍九十飲食不離寢膳飲從於遊可也六十歲制七十時制

八十月制九十日修唯絞衿衾冒死而后制五十始衰
六十非肉不飽七十非帛不煖八十非人不煖九十雖
得人不煖矣五十杖於家六十杖於鄉七十杖於國八
十杖於朝九十者天子欲有問焉則就其室以珍從七
十不俟朝八十月告存九十日有秩五十不從力政六
十不與服戎七十不與賓客之事八十齊衰之事弗及
也五十而爵六十不親學七十致政唯齊麻為喪有
虞氏養國老於上庠養庶老於下庠夏后氏養國老於

東序養庶老於西序殷人養國老於右學養庶老於左
學周人養國老於東膠養庶老於虞庠虞庠在國之西
郊有虞氏皇而祭深衣而養老夏后氏收而祭燕衣而
養老殷人冔而祭縞衣而養老周人冕而祭玄衣而養
老凡三王養老皆引年八十者一子不從政九十者其
家不從政廢疾非人不養者一人不從政父母之喪三
年不從政齊衰大功之喪三月不從政將徙於諸侯三
月不從政自諸侯來徙家期不從政少而無父者謂

之孤老而無子者謂之獨老而無妻者謂之矜老而無夫者謂之寡此四者天民之窮而無告者也皆有常餽瘠聾跛躄斷者侏儒百工各以其器食之道路男子由右婦人由左車從中央父之齒隨行兄之齒鴈行朋友不相踰輕任并重任分斑白者不提挈君子耆老不徒行庶人耆老不徒食

○王制○內則九十者其家不從政瞽亦如之凡父母在子雖

老不坐其餘文同無少而無父以下

凡養老五帝憲三王有乞言五帝

憲養氣體而不乞言有善則記之為惇史三王亦憲既

養老而后乞言亦微其禮皆有惇史則

○內

昔者有虞

氏貴德而尚齒夏后氏貴爵而尚齒殷人貴富而尚齒
周人貴親而尚齒虞夏殷周天下之盛王也未有遺年
者年之貴乎天下久矣次乎事親也是故朝廷同爵則
尚齒七十杖於朝君問則席八十不俟朝君問則就之
而弟達乎朝廷矣行肩而不併不錯則隨見老者則車
徒辟斑白者不以其任行乎道路而弟達乎道路矣居
鄉以齒而老窮不遺強不犯弱衆不暴寡而弟達乎州

巷矣古之道五十不為甸徒頒禽隆諸長者而弟達乎
搜狩矣軍旅什伍同爵則尚齒而弟達乎軍旅矣孝弟
發諸朝廷行乎道路至乎州巷放乎搜狩修乎軍旅衆
以義死之而弗敢犯也祀乎明堂所以教諸侯之孝也
食三老五更於大學所以教諸侯之弟也祀先賢於西
學所以教諸侯之德也耕藉所以教諸侯之養也朝覲
所以教諸侯之臣也五者天下之大教也食三老五更
於大學天子袒而割牲執醬而饋執爵而醕冕而總干

所以教諸侯之弟也是故鄉里有齒而老窮不遺強不
犯弱衆不暴寡此由大學來者也天子設四學當入學
而太子齒天子巡守諸侯待于竟天子先見百年者八
十九十者東行西行者弗敢過西行東行者弗敢過欲
言政者君就之可也壹命齒于鄉里再命齒于族三命
不齒族有七十者弗敢先也七十者不有大故不入朝
若有大故而入君必與之揖讓而后及爵者天子有善
讓德於天諸侯有善歸諸天子卿大夫有善薦於諸侯

士庶人有善本諸父母存諸長老祿爵慶賞成諸宗廟
所以示順也○祭義

王制

禮記王者之制爵祿公侯伯子男凡五等諸侯之上大
夫卿下大夫上士中士下士凡五等 天子三公九卿
二十七大夫八十一元士大國三卿皆命於天子下大
夫五人上士二十七人次國三卿二卿命於天子一卿
命於其君下大夫五人上士二十七人小國二卿皆命

於其君下大夫五人上士二十七人 制三公一命卷
若有加則賜也不過九命次國之君不過七命小國之
君不過五命大國之卿不過三命下卿再命小國之卿
與下大夫一命 次國之上卿位當大國之中中當其
下下當其上大夫小國之上卿位當大國之下卿中當其
大夫下當其下大夫其有中士下士者數各居其上之
三分 天子之田方千里公侯田方百里伯七十里子
男五十里不能五十里者不合於天子附於諸侯曰附

庸天子三公之田視公侯天子之卿視伯天子之大夫
視子男天子之元士視附庸 制農田百畝百畝之分
上農夫食九人其次食八人其次食七人其次食六人
下農夫食五人庶人在官者其祿以是為差也諸侯之
下士視上農夫祿足以代其耕也中士倍下士上士倍
中士下大夫倍上士卿四大夫祿君十卿祿次國之卿
三大夫祿君十卿祿小國之卿倍大夫祿君十卿祿
古者公田藉而不稅市廛而不稅關譏而不征林麓川

澤以時入而不禁夫圭田無征用民之力歲不過三日
田里不粥墓地不請凡四海之內九州州方千里州
建百里之國三十七十里之國六十五十里之國百有
二十凡二百一十國名山大澤不以封其餘以為附庸
閒田八州州二百一十國天子之縣內方百里之國九
七十里之國二十有一五十里之國六十有三凡九十
三國名山大澤不以盼其餘以祿士以為閒田凡九州
千七百七十三國天子之元士諸侯之附庸不與天

子百里之內以共官千里之內以為御千里之外設方伯五國以為屬屬有長十國以為連連有帥三十國以為率率有正二百一十國以為州州有伯八州八伯五十六正百六十八帥三百三十六長八伯各以其屬屬於天子之老二人分天下以為左右曰二伯千里之內曰甸千里之外曰采曰流天子之縣內諸侯祿也外諸侯嗣也方一里者為田九百畝方十里者為方一里者百為田九萬畝方百里者為方十里者百為田九

十億畝方千里者為方百里者百為田九萬億畝自恒山至於南河千里而近自南河至於江千里而近自江至於衡山千里而遙自東河至於東海千里而遙自東河至於西河千里而近自西河至於流沙千里而遙西不盡流沙南不盡衡山東不盡東海北不盡恒山凡四海之內斷長補短方三千里為田八十萬億一萬億畝方百里者為田九十億畝山陵林麓川澤溝瀆城郭宮室塗巷三分去一其餘六十億畝古者以周尺八尺為

步今以周尺六尺四寸為步古者百畝當今東田百四十六畝三十步古者百里當今百二十一里六十步四尺二寸二分方千里者為方百里者百封方百里者三十國其餘方百里者七十又封方七十里者六十為方百里者二十九方十里者四十其餘方百里者四十方十里者六十又封方五十里者百二十為方百里者三十其餘方百里者十方十里者六十名山大澤不以封其餘以為附庸閒田諸侯之有功者取於閒田以祿

之其有削地者歸之閒田天子之縣內方千里者為方
百里者百封方百里者九其餘方百里者九十一又封
方七十里者二十一為方百里者十方十里者二十九
其餘方百里者八十方十里者七十一又封方五十里
者六十三為方百里者十五方十里者七十五其餘方
百里者六十四方十里者九十六 諸侯之下士祿食
九人中士食十八人上士食三十六人下大夫食七十
二人卿食二百八十八人君食二千八百八十人次國

之卿食二百一十六人君食二千一百六十人小國之卿食百四十四人君食千四百四十人次國之卿命於其君者如小國之卿天子使其大夫為三監監於方伯之國國三人天子之大夫為三監監於諸侯之國者其祿視諸侯之卿其爵視次國之君其祿取之於方伯之地方伯為朝天子皆有湯沐之邑於天子之縣內視元士諸侯世子世國大夫不世爵使以德爵以功未賜爵視天子之元士以君其國諸侯之大夫不世爵

祿○王
制

樂記

禮記

樂記

凡音之起由人心生也人心之動物使之然也

感於物而動故形於聲聲相應故生變變成方謂之音
比音而樂之及于戚羽旄謂之樂樂者音之所由生也
其本在人心之感於物也是故其哀心感者其聲噍以
殺其樂心感者其聲嘽以緩其喜心感者其聲發以散
其怒心感者其聲粗以厲其敬心感者其聲直以廉其

愛心感者其聲和以柔六者非性也感於物而后動是故先王慎所以感之者故禮以道其志樂以和其聲政以一其行刑以防其奸禮樂刑政其極一也所以同民心而出治道也凡音者生人心者也情動於中故形於聲聲成文謂之音是故治世之音安以樂其政和亂世之音怨以怒其政乖亡國之音哀以思其民困聲音之道與政通矣宮為君商為臣角為民徵為事羽為物五者不亂則無怙懣之音矣宮亂則荒其君驕商亂則陂

其臣壞角亂則憂其民怨徵亂則哀其事勤羽亂則危其財匱五者皆亂迭相陵謂之慢如此則國之滅亡無日矣鄭衛之音亂世之音也比於慢矣桑閒濮上之音亡國之音也其政散則民流誣上行私而不可止也凡音者生於人心者也樂者通倫理者也是故知聲而不知音者禽獸是也知音而不知樂者衆庶是也唯君子為能知樂是故審聲以知音審音以知樂審樂以知政而治道備矣是故不知聲者不可與言音不知音者不

可與言樂知樂則幾於禮矣禮樂皆得謂之有德德者得也是故樂之隆非極音也食饗之禮非致味也清廟之瑟朱絃而疏越壹倡而三歎有遺音者矣大饗之禮尚玄酒而俎腥魚大羹不和有遺味者矣是故先王之制禮樂也非以極口腹耳目之欲也將以教民平好惡而反人道之正也人生而靜天之性也感於物而動性之欲也物至知知然後好惡形焉好惡無節於內知誘於外不能反躬天理滅矣夫物之感人無窮而人之好

惡無節則是物至而人化物也人化物也者滅天理而窮人欲者也於是有悖逆詐僞之心有淫泆作亂之事是故彊者脅弱衆者暴寡知者詐愚勇者苦怯疾病不養老幼孤獨不得其所此大亂之道也是故先王之制禮樂人為之節衰麻哭泣所以節喪紀也鐘鼓干戚所以和安樂也昏姻冠笄所以別男女也射鄉食饗所以正交接也禮節民心樂和民聲政以行之刑以防之禮樂刑政四達而不悖則王道備矣樂者為同禮者為

異同則相親異則相敬樂勝則流禮勝則離合情飾貌者禮樂之事也禮義立則貴賤等矣樂文同則上下和矣好惡著則賢不肖別矣刑禁暴爵舉賢則政均矣仁以愛之義以正之如此則民治行矣樂由中出禮自外作樂由中出故靜禮自外作故文大樂必易大禮必簡樂至則無怨禮至則不爭揖讓而治天下者禮樂之謂也暴民不作諸侯賓服兵革不試五刑不用百姓無患天子不怒如此則樂達矣合父子之親明長幼之序以

敬四海之內天子如此則禮行矣大樂與天地同和大
禮與天地同節和故百物不失節故祀天祭地明則有
禮樂幽則有鬼神如此則四海之內合敬同愛矣禮者
殊事合敬者也樂者異文合愛者也禮樂之情同故明
王以相洽也故事與時並名與功偕故鐘鼓管磬羽籥
干戚樂之器也屈伸俯仰綴兆舒疾樂之文也簠簋俎
豆制度文章禮之器也升降上下周還裼襲禮之文也
故知禮樂之情者能作識禮樂之文者能述作者之謂

聖述者之謂明明聖者述作之謂也樂者天地之和也
禮者天地之序也和故百物皆化序故羣物皆別樂由
天作禮以地制過制則亂過作則暴明於天地然後能
興禮樂也論倫無患樂之情也欣喜歡愛樂之官也中
正無邪禮之質也莊敬恭順禮之制也若夫禮樂之施
於金石越於聲音用於宗廟社稷事乎山川鬼神則此
所與民同也王者功成作樂治定制禮其功大者其
樂備其治辯者其禮具千戚之舞非備樂也孰亨而祀

非達禮也五帝殊時不相沿樂三王異世不相襲禮樂
極則憂禮粗則偏矣及夫敦樂而無憂禮備而不偏者
其唯大聖乎天高地下萬物散殊而禮制行矣流而不
息合同而化而樂興焉春作夏長仁也秋斂冬藏義也
仁近於樂義近於禮樂者敦和率神而從天禮者別宜
居鬼而從地故聖人作樂以應天制禮以配地禮樂明
備天地官矣天尊地卑君臣定矣卑高以陳貴賤位矣
動靜有常小大殊矣方以類聚物以羣分則性命不同

矣在天成象在地成形如此則禮者天地之別也地氣上齊天氣下降陰陽相摩天地相蕩鼓之以雷霆奮之以風雨動之以四時煖之以日月而百化興焉如此則樂者天地之和也化不時則不生男女無辨則亂升天地之情也及夫禮樂之極乎天而蟠乎地行乎陰陽而通乎鬼神窮高極遠而測深厚樂著太始而禮居成物著不息者天也著不動者地也一動一靜者天地之間也故聖人曰禮樂云昔者舜作五絃之琴以歌南風

夔始制樂以賞諸侯故天子之為樂也以賞諸侯之有德者也德盛而教尊五穀時熟然後賞之以樂故其治民勞者其舞行綴遠其治民逸者其舞行綴短故觀其舞知其德聞其謚知其行也大章章之也咸池備矣韶繼也夏大也殷周之樂盡矣天地之道寒暑不時則疾風雨不節則饑教者民之寒暑也教不時則傷世事者民之風雨也事不節則無功然則先王之為樂也以法治也善則行象德矣夫豢豕為酒非以為禍也而獄訟益

繁則酒之流生禍也是故先王因為酒禮壹獻之禮賓主百拜終日飲酒而不得醉焉此先王之所以備酒禍也故酒食者所以合歡也樂者所以象德也禮者所以綴淫也是故先王有大事必有禮以哀之有大福必有禮以樂之哀樂之分皆以禮終樂也者聖人之所以樂也而可以善民心其感人深其移風易俗故先王著其教焉夫民有血氣心知之性而無哀樂喜怒之常應感起物而動然後心術形焉是故志微噍殺之音作而

民思憂嘆諧慢易繁文簡節之音作而民康樂粗厲猛起奮未廣賁之音作而民剛毅廉直勁正莊誠之音作而民肅敬寬裕肉好順成和動之音作而民慈愛流辟邪散狄成滌濫之音作而民淫亂是故先王本之情性稽之度數制之禮義合生氣之和道五常之行使之陽而不散陰而不密剛氣不怒柔氣不懾四暢交於中而發作於外皆安其位而不相奪也然後立之學等廣其節奏省其文采以繩德厚律小大之稱比終始之序以

象事行使親疏貴賤長幼男女之理皆形見於樂故曰
樂觀其深矣土敝則草木不長水煩則魚鼈不大氣衰
則生物不遂世亂則禮慝而樂淫是故其聲哀而不莊
樂而不安慢易以犯節流湏以忘本廣則容姦狹則思
欲感條暢之氣滅平和之德是以君子賤之也 凡姦
聲感人而逆氣應之逆氣成象而淫樂興焉正聲感人
而順氣應之順氣成象而和樂興焉倡和有應回邪曲
直各歸其分而萬物之理各以類相動也是故君子反情

以和其志比類以成其行奸聲亂色不留聰明淫樂慝
禮不接心術惰慢邪僻之氣不設於身體使耳目鼻口
心知百體皆由順正以行其義然後發以聲音而文以
琴瑟動以干戚飾以羽旄從以簫管奮至德之光動四
氣之和以著萬物之理是故清明象天廣大象地終始
象四時周還象風雨五色成文而不亂八風從律而不
姦百度得數而有常小大相成終始相生倡和清濁迭
相為經故樂行而倫清耳目聰明血氣和平移風易俗

天下皆寧故曰樂者樂也君子樂得其道小人樂得其欲以道制欲則樂而不亂以欲忘道則惑而不樂是故君子反情以和其志廣樂以成其教樂行而民鄉方可以觀德矣德者性之端也樂者德之華也金石絲竹樂之器也詩言其志也歌咏其聲也舞動其容也三者本於心然後樂器從之是故情深而文明氣盛而化神和順積中而英華發外惟樂不可以為偽樂者心之動也聲者樂之象也文采節奏聲之飾也君子動其本樂其

象然後治其飾是故先鼓以警戒三步以見方再始以著往復亂以飭歸奮疾而不拔極幽而不隱獨樂其志不厭其道備舉其道不私其欲是故情見而義立樂終而德尊君子以好善小人以聽過故曰生民之道樂為大焉樂也者施也禮也者報也樂樂其所自生禮反其所自始樂章德禮報情反始也所謂大輅者天子之車也龍旂九旒天子之旌也青黑緣者天子之寶龜也從之以牛羊之羣則所以贈諸侯也 樂也者情之不可

變者也禮也者理之不可易者也樂統同禮辨異禮樂之說管乎人情矣窮本知變樂之情也著誠去偽禮之經也禮樂負天地之情達神明之德降興上下之神而凝是精粗之體領父子君臣之節是故大人舉禮樂則天地將為昭焉天地訢合陰陽相得煦妪覆育萬物然後草木茂區萌達羽翼奮角觝生蟄蟲昭蘇羽者嫗伏毛者孕鬻胎生者不殯而卵生者不殂則樂之道歸焉耳樂者非謂黃鍾大呂弦歌干揚也樂之末節也故童


者舞之鋪筵席陳尊俎列籩豆以升降為禮者禮之末節也故有司掌之樂師辨乎聲詩故北面而弦宗祝辨乎宗廟之禮故後尸商祝辨乎喪禮故後主人是故德成而上藝成而下行成而先事成而後是故先王有上有下有先有後然後可以有制於天下也 君子曰禮樂不可斯須去身致樂以治心則易直子諒之心油然而生矣易直子諒之心生則樂樂則安安則久久則天天則神天則不言而信神則不怒而威致樂以治心者也

致禮以治躬則莊敬莊敬則嚴威心中斯須不和不樂而鄙詐之心入之矣外貌斯須不莊不敬而易慢之心入之矣故樂也者動於內者也禮也者動於外者也樂極和禮極順內和而外順則民瞻其顏色而弗與爭也望其容貌而民不生易慢焉故德輝動於內而民莫不承聽理發諸外而民莫不承順故曰致禮樂之道舉而錯之天下無難矣樂也者動於內者也禮也者動於外者也故禮主其減樂主其盈禮減而進以進為文樂盈

而反以反為文禮減而不進則銷樂盈而不反則放故
禮有報而樂有反禮得其報則樂樂得其反則安禮之
報樂之反其義一也夫樂者樂也人情之所不能免也
樂必發於聲音形於動靜人之道也聲音動靜性術之
變盡於此矣故人不耐無樂樂不耐無形形而不為道
不耐無亂先王恥其亂故制雅頌之聲以道之使其聲
足樂而不流使其文足論而不息使其曲直繁瘠廉肉
節奏足以感動人之善心而已矣不使放心邪氣得接

馬是先王立樂之方也是故樂在宗廟之中君臣上下
同聽之則莫不和敬在族長鄉里之中長幼同聽之則
莫不和順在閭門之內父子兄弟同聽之則莫不和親
故樂者審一以定和比物以飾節節奏合以成文所以
合和父子君臣附親萬民也是先王立樂之方也故聽
其雅頌之聲志意得廣焉執其干戚習其俯仰詘伸容
貌得莊焉行其綴兆要其節奏行列得正焉進退得齊
焉故樂者天地之命中和之紀人情之所不能免也夫

樂者先王之所以飾喜也軍旅鈇鉞者先王之所以飾
怒也故先王之喜怒皆得其儕焉喜則天下和之怒則
暴亂者畏之先王之道禮樂可謂盛矣



繹史卷二十四之六